

Pelegrins fascegn a geja a la Madonna de Baissiston

Monseignor Mariano Manzana, che à ofizià messa ensema ai preves de la val, à recordà che cognon preèr per la vocazions



Ence i bec de la Creisema e de la Pruma Comunion à volù esser en pelegrinaje. (foto Ivano Winterle)

Devozion - No se podea domanèr na giornèda più bela e ciauda desche chela de en domenia passèda ai 17 de mè per jir en pelegrinaje a la Madonna de Baissiston. Desche oramai da tradizion tel meis de mè, l'Decanat de Fascia à endreza de jir a geja a Bassiston. An dò an semper più jent rua te chesta di de festa a la Madonna di Set Dolores, fosc per l'besegn de ge dir a la Madonna n deelpai o ge domanèr na man te n moment senester o demò per stèr ensema a la familia. Tropes é ruè a pé da Mont de Vich, da Schwarzenbach o da Monte San Pietro, chi co la roda, desche l'grop de la rodes de Fascia, chi che enveze

é ponté demez ensema a don Stefan da Cianacei e tropes ence co l'auto.

Da les 11 da doman, inant messa grana, l'é stat fat la procescion olache à tout pèrt vèlch autorità, i bec de la Creisema e chi che à giusta ciapà la Pruma Comunion e con ic duc i preves de la val compagne da Monseignor Mariano Manzana che l'à ence ofizià la messa. Monseignor Mariano Manzana l'é da Mori e l'é l'vescof che dal 2004 rec la Diozesa de Mossorò tel Brasil. "Ve domane perdonanza se no son bon de rejonèr ladin", l'é stat la pruma roba che l'à dit dò l'salut del decan de Fascia don Giuseppe Da Prà. L'era belebon emozionà percheche l'é stat per el n

gran onor aer ciapà l'envit, ajache, descheche l'à recordà, l'era 50 egn che no l'ruèa più tel santuarie de Baissiston. Dò messa l'à podù ence rejonèr con doi fascegn che era te seminarie con el canche l'studièda da preve, e se ence che l'é passà vèlch an e no i se aea più vedù, l'se recordèda amò si inomes. Te la perdicia, Monseignor Mariano Manzana l'à recordà che ge vel preèr per la families ma ence per la vocazions percheche nesc fies vae preves e no semper per i fies del vejìn. Dò marena, da la does, l'é stat dit sù la corona, i bec de la Pruma Comunion e chi de la Creisema à dit sù i Mistères e l'é stat ence benedì i malé. (Ir)



Tropa jent é ruèda a Baissiston a pé o co la roda per l'pelegrinaje endrezà dal Decanat de Fascia. (foto Ivano Winterle)



Monseignor Mariano Manzana à tout pèrt al pelegrinaje di fascegn.